

L'ultim Rumantsch – Ina nova seria ficziunala

Radiotelevision Svizra Rumantscha producescha quest onn sia segunda seria ficziunala rumantscha. Questa giada vai per la famiglia Durisch, la proprietaria da la pli gronda chasa da medias dal Grischun – ed il futur da l'ultima gasetta rumantscha.

RTR producescha quest onn sia segunda seria ficziunala rumantscha. Per questa seria ha RTR lantschà il 2021/22 ina concorrenza per inoltrar ideas. Ina giuria ha selecziunà ord ils differents dossiers inoltrads l'istorgia «L'ultim Rumantsch» – Ina seria da *Sophie Toth* ed *Adrian Perez*.

Da tge sa tracta en la nova seria?

En il center da la seria stat la famiglia Durisch, proprietaria da la pli gronda chasa da medias dal Grischun. Sco giuven ha Gion-Peder (85, numnà GP) fundà l'interpresa. Avant onns ha el dentant decidì da surdar quella a ses figl Gion (52). Quel vul spargnar e reorganisar la fatschenta e betg pli producir la gasetta nunrentabla POSTA. Il conflict è programmà! Perquai che la Posta è il project da cor da GP na vul el savair nagut pli da ses figl. I na sa tracta betg mo da l'emprima gasetta ch'el ha fundà, mabain er da l'ultima gasetta rumantscha insumma.

Cura che GP mora cumenza il cumbat en la famiglia. El testamentscha ina part da la chasa da medias a sia biadia Ladina (24), quai cun il giavisch ch'ella surpiglia e mainia vinavant la Posta. Ma Ladina na vuless avair da far nagut cun il mund da las medias e cun sia famiglia. Dapi onns abita ella a Turitg e cumbatta sco activista cunter concerns gronds e per dretgs d'animals. Vegn Ladina a suprender l'ierta da ses tat?

Tgi stat davos la seria?

Il cineast Adrian Perez ha sviluppà il concept ensemen cun la producenta Sophie Toth da Shining film. En in writers room (*Simon Nagel, Jen Ries, Adrian Perez*) è il concept lura vegnì finalisà. *Manuel Sieber* da la firma da producziun Schau a Cuir è la persuna da contact da Sophie Toth ed Adrian Perez.

Tschertga: ActurAs e statistAs

Per la realisaziun da la seria èn ils responsabels ussa a la tschertga d'acturAs e statistAs. Interessentas ed interessents pon s'annunziar via il suandant QR-Code. (rtr/fmr)